

安龍紀事 十
攝相行事。內外大權盡歸龐馬。時人以佐辰與綱相貌醜
劣。詔事權奸。供龐馬指麾。號佐辰爲判官。扶綱爲小鬼。而
國勢日削矣。

吳貞毓宜興人。祖母趙氏享年一百有一歲。丙辰生時
年九十有七矣。壽享百歲。榜登會元。官居宰相。名著忠
臣。此人間四難也。而皆萃一門。嗚呼盛哉。

戴重事錄

章學誠

戴重字敬夫。和州人。父淳重。兒時卽嬉戲爲兵械。習行陳。
年十五爲弟子員。喪父哀毀。事祖母與母以孝聞。師江浦
鄭朝聘。講良知之學。慨然志于古人。窮經餘暇。抵掌談兵。
朝聘疾。趨侍湯藥。及卒爲位哭。制心喪。築室爲木主。祀朝
聘。與同志四五人。廬處其中。知和州將亂。移家南京。崇禎
八年。流寇屠和州。後稍輯流亡。重歸省鄉井。傷學校荒蕪。
作哀頌宮賦。聞中原寇盜縱橫。每仰天擊劍。彎弓作霹靂
聲。悲歌泣下。壬午鄉試被放。欲上書請莊烈帝。遷都陝西。
不得達。重通術數。時怪異迭臻。雞骨塘水久涸。居人忽望

見白浪漲天。就視無有。重愀然曰。是所謂陽燄也。沿江餓殍相藉。重挈家流離。卜居橫望山。橫經講肄。弟子自遠而至。會盜起。移家太平。後又營居州西北鷹阿山。甲申順治元年三月明亡。五月。大清定鼎京師。福王南都建國。應天巡撫程世昌聘重入幕。應之用。選貢召試武英殿。是時故明諸臣如史可法。姜日廣者。頗以忠義自奮。而馬士英引用奸黨阮大鍼。日以鬻官報怨爲事。聞者解體。重既入試。論中指斥奸黨。主司擢爲第一。士英見其文。怒甚。將中以禍會有解者。得授湖州府推官。既而士英聞重有盛名。欲招致之。知重有澄泥硯。使其客厚幣結重。索硯爲贄。重

謝曰。明公黃金白壁高山斗窮書生。擁一破硯。無勞深慮也。拂衣徑去。以書抵故都御史劉宗周。宗周偉其議。宗周尋罷。相與涕泣而別。重歸石臼湖。乙酉甯南侯左良玉將稱兵東下。列士英八大罪。檄遠近以清君側爲名。走使聘重。重不應。與韓繹祖等十二人。結不可忘社。會哭莊烈帝。時巡按山東御史凌駟馳書因史可法招重。期以戮力中原。爲南都嚮應。將赴之。俄而凌駟死難。重北望遙哭。自詫曰。天不使我借凌公死。豈尙有待耶。卽赴南京謁選吏部。注廉州。時南都人爭譁。日現五采。重獨見日中黑暈。罩都城。有氣如墨。因嘆曰。黑雲壓城。城欲摧。勢不旋踵矣。復歸

石曰湖集鄉人教射爲正社盟從者數十人已而程世昌得罪不得代將挈家如湖州邀重偕行重從之行次衛濱亂兵阻其舟重用計斬其魁揚帆入太湖風濤甚厲望東西兩洞庭山出沒浮漚船如箭激將抵夾浦見湖中棄甲毀盾並流而下知南都已破遂由大全港抵後林村村中人故都御史潘絃子國瓚爲重治戴山別業館之有烏程書生嚴啟隆語重曰程公深受國恩夙有名望或者天未棄周人猶思漢今日巡撫敕印尙在不以此時戮力亦奚以爲誠假列祖之靈号召天下豪傑東收吳會西連閩越相機而進天下事未可知也不務出此而匿身避禍顧影


求全日後按籍誅求卽欲逍遙若霄之間豈可得乎重因以激厲世昌世昌畏憚不決重遂謝去會大清兵下湖州蘇湖間遺民故臣多建勝國義旗謀抗王師數來聘重重俱不赴獨與潘國瓚嚴啟隆計曰丈夫舉事成敗利鈍非所逆觀因人成事志士不爲也今欲與諸君同大義聚鄉黨豪俊自爲一軍以待四方嚮應何如啟隆國瓚皆諾重因屬世昌故將趙麟趾而國瓚薦其客王元震者謂其短小精悍膽力絕人可任重大相與盟於後林當是時招集義軍二千餘人斂湖舸五百艘世家巨室望風輸金助軍實瓚亦罄家資犒軍簡陳器械部勒行伍遂縞素誓

師于象口。自長興達洞庭山。故明將吏若黃蜚錢棟吳易
 盧象觀之徒。皆聚衆太湖。悉以其師來會。而洞庭富室蔡
 允心者。斂家資數十萬金。來給重軍。韓繹祖亦統長興之
 衆千餘人。皆推楚藩所謂通城王者。明史年表及諸王傳
 俱未載其事無攷
 以作號令。重建議曰。韓繹祖以長興兵由廣德復太平。據
 采石之險。黃蜚以太湖兵走京口。逕襲南京。已率後林兵
 疾趨錢唐。以合江東之師。則江南可恢復也。部署既定。值
 中秋月夜。酌酒大會於洞庭山。悲歡而散。越五日。逆我
 大清兵於蒼溪。前軍王元震以烏鎗數百頭。出沒奮擊。縱
 火焚大舟。夾岸伏弩齊發。我師頗有傷者。大軍稍卻。重

方集衆昆山。勞苦將士。忽大風雷。中軍豹纛吹折。帆檣旗
 幟皆裂。比明檢校殘軍。無復行列。乃仰天大慟。謂元震曰。
 自與公等舉義。馬革裹尸。夙所願也。今三軍未交。天意如
 此。人事復何望乎。因慷慨賦詩。有更遣包胥何處哭。誰爲
 荆軻復同謀之句。聞者悲之。還泊後林。將收舟入洞庭山。
 集師再舉會。大清兵進勦後林。重亟出。大軍遙望射
 之。發三矢。皆格落不得近。而元震方掉舟急流。殊死力戰。
 大呼馳突。重急與啟隆率衆繼進。我軍有小校。隱坳垣自
 左出不意射之。重中矢洞腹。飲羽重拔出其鏃。按創疾走。
 顏色不少動。遇啟隆亦被刀創。於是導重從歧途遁去。方

重將舉事以家寄東林。至是轉側歸東林山中。大軍將
進勦之。以趙麟趾歸降。乞保東林得無恙。大軍自蒼溪
返湖州。以所擒元震鞫主謀姓氏。元震至死不出一語。重
卧東林。金創潰裂。下血數斗。自擬必死。作死問篇。後創漸
平。乃爲僧。行遁歸和州。遂栖馬鞍寺。聞四方以頑民舉義
者。日就俘戮。自悲惋。決意絕食。初猶飲水。其子潛進以葷
不得死。凡十日迎歸于家。更進湯液。輒揮去。遺誠數百言。
母作浮屠。經識事。書墓石。明和州河村戴重墓。棺止四寸。
踰月而葬。又九日端坐正衣冠卒。年四十五。是爲順治三
年。距被創周一歲矣。子四人。本孝移孝最知名。

論曰。我朝敕修明史。凡前明抗節諸臣。悉予褒錄。無忌
諱。恢宏之度。曠古未聞。蓋所以扶植綱常也。戴重以亡國
一諸生。不自量。力號召義旅。縞素出師。其志可哀矣。而不
得與復社諸生江天一等。竝載明史。若蔡允心者。毀家助
餉。予考之具區志。太湖備考。佚其姓字。其詳蓋不得聞矣。
章實齋修和州志。爲重作傳。而今再修和州志。削去之。
余乃芟章傳之煩。而存此。



<p>...</p>	<p>...</p>	<p>...</p>
------------	------------	------------

